



▲ 南宋 李公麟 白莲社图卷(局部)纸本

## 01

### 答禅者

五老峰前相遇时，两无言语只扬眉。  
南宗北祖皆如此，天上人间更问谁。  
山衲静披云片片，铁刀凉削鬓丝丝。  
闲吟莫学汤从事，抛却袈裟负本师。

## 02

### 落花

朝开暮亦衰，雨打复风吹。  
古屋无人处，残阳满地时。  
静依青藓片，闲缀绿莎枝。  
繁艳根枝在，明年向此期。

## 03

## 秋江

两岸山青映，中流一棹声。  
远无风浪动，正向夕阳横。  
岛屿蝉分宿，沙洲客独行。  
浩然心自合，何必濯吾缨。

## 04

### 过西塞山

空江平野流，风岛苇飕飕。  
残日衔西塞，孤帆向北洲。  
边鸿渡汉口，楚树出吴头。  
终入高云里，身依片石休。

## 05

### 早梅

万木冻欲折，孤根暖独回。  
前村深雪里，昨夜一枝开。  
风递幽香出，禽窥素艳来。  
明年如应律，先发望春台。

## 06

### 相和歌辞 苦寒行

冰峰撑空寒矗矗，  
雪（一作云）凝水冻埋海陆。  
杀物之性，伤人之欲。  
既不能断绝蒺藜荆棘之根株，  
又不能展凤皇麒麟之拳局。  
如此则何如为和煦，为膏雨。

自然天下之荣枯，融融于万户。

## 07

### 君子行

圣人不生，麟龙何瑞？  
梧桐不高，凤凰何止？  
吾闻古之有君子，行藏以时，进退求己。  
荣必为天下荣，耻必为天下耻。  
苟进不如此。  
亦何必用虚伪之文章，取荣名而自美。

## 08

### 剑客

拔剑绕残樽，歌终便出门。  
西风满天雪，何处报人恩。  
勇死寻常事，轻雠不足论。  
翻嫌易水上，细碎动离魂。

## 09

### 自题

禅外求诗妙，年来鬓已秋。  
未尝将一字，容易谒诸侯。  
挂梦山皆远，题名石尽幽。  
敢言梁太子，傍采碧云流。

## 10

荆州新秋病起杂题 病起见庭柏

病起见庭柏，青青我不任。  
力扶乾瘦骨，勉对岁寒心。  
韵谢疏篁合，根容片石侵。  
衰残想长寿，时倚就闲吟。

## 11

### 渚宫莫问诗十五首 其三

予以辛巳歲，蒙主人命居龙安寺，察其疎鄙，免以趨奉。爰降手翰，曰盖知心不在常礼也。予不觉欣然而作，顾谓形影曰：尔本青山一衲，白石孤禅。今王侯構室安之、给俸食之，使之乐然，万事都外，游息自得，则云泉猿鸟不必为狎，其放纵若是，夫何系乎？自是龙门墙仞，歷稔不复瞻覬。况他家哉？因创莫问之题，凡一十五篇，皆以莫问为首焉。

莫问休行脚，南方已遍寻。  
了应须自了，心不是他心。  
赤水珠何觅，寒山偈莫吟。  
谁同论此理，杜口少知音。

---

#### 参考资料：

1. 《宋高僧传》卷30齐己传
2. 《白莲集序》云：“晚岁将之岷峨，假途渚宫，太师南平王筑净室以居之，舍净财以供之。”彼时“嵩岳去值乱，匡庐回阻兵”的情形迫使齐己接受了南平王高季兴的挽留。
3. 《四库全书总目·白莲集》云：“唐代缁流，能诗者众，其有集传于今者，惟皎然、贯休及齐。皎然清而弱，贯休豪而麤。齐己七言律诗，不出当时之习。其七言古诗，以卢仝、马异之体缩惟短章，诘屈聱牙，尤不足取。惟五言律诗居全集十分之六，虽颇延武功一派，而风格独遒，如《剑客》、《听琴》、《祝融峰》诸篇，犹有大历以还遗志。”
4. 齐己的诗歌研究，刘雯雯 2007